

Croesawu oedfa'r Eisteddfod yn ôl i'r pafiliwn

Yn ystod y blynyddoedd diwethaf hyn, aeth yn arferiad cynnal oedfa'r Eisteddfod mewn capel lleol. Fodd bynnag, eleni daeth y cyfle i weithio gyda Phwyllgor Gwaith yr Eisteddfod i drefnu oedfa yn y prif bafiliwn ar y Maes. Gan fod yna gryn gystadlu hefyd, bu'n rhaid cynnal yr oedfa'n blygeiniol am 9 o'r gloch y bore, ond braf oedd gweld llond llwyfan a chynulleidfa deilwng wedi crynhoi yn y pafiliwn.

Fe'n croesawyd gan Elin Jones AS, Cadeirydd y Pwyllgor Gwaith, a chanwyd emynau ac iddynt naws lleol o waith y diweddar Barchedigion W. J. Gruffydd a Dafydd Edwards. Offrymwyd gweddi hefyd o waith y Parch. D. Ben Rees. Gyda llwyfan lliwgar a phlant a phobl ifanc yn cynrychioli Ysgol Sul Capel Bwlch-gwynt, Tregaron, a chôr unedig Adrannau Aberystwyth a Llanbed, ag unawd gan Nanw Griffiths Jones, cafwyd gwledd o lefaru a chanu. Roedd Côr yr Eisteddfod hefyd ar y llwyfan

yn arwain y canu, a diolch am fawl gafaelgar a swynol. Bu nifer o unigolion yn cymryd rhan drwy gyflwyno unawdau a darlenniadau, gan ein tywys ar daith hanesyddol yn olrhain treftadaeth Gristnogol y fro.

Dilynwyd thema'r Eisteddfod eleni ar gyfer yr oedfa, sef 'Dadeni', a cafwyd anerchiad effeithiol a chlir gan y Parch. Densil Morgan, gyda'r Parch. Carwyn Arthur yn cloi gyda gweddi. Diolch i Densil am ei neges, a braf yw cael rhannu'r neges honno â darllenwyr *Cenn@d*. Gwnaed casgliad at waith Cymorth Cristnogol yn Wcráin. Diolchwn i bobl Ceredigion am oedfa fendithiol ac ystyrlon.

*Aled Davies
Trefnydd digwyddiadau Cytûn*



Nifer o'r rhai fu'n cymryd rhan yn yr oedfa yn y pafiliwn